

ARGUMENTONAN PRO SUSPENSION DI DONNAN MILAGROSO

Predikashi di Dr. Tom Pennington

<https://www.youtube.com/watch?v=9o0z-J4RnwE>

Mi ta kontentu, awe mainta, pa trese dilanti argumentonan bíbliko pro suspenshon di donnan milagroso. E problema prinsipal di e titulo “suspenshon” no ta ku e ta un ekspreshon negativo, ma ku algun hende ta karakteris’é komo e kreensia ku Spiritu Santu ta suspendé Su obra. Komo resultado, nos ta akusá inhusamente ku nos ta obligá e Spiritu pa obra manera nos ta haña ta bon, ku nos ta aseptá un punto di bista no-bíbliko, antikuá i no-iluminá. Ma e karakterisashon ei ta trose realidat. Di bèrdat, nos ta kere ku Spiritu Santu no solamente ta kontinuá Su obra, ma ku E ta demonstrá e poder di e resurekshon di Kristu den i dor di nos. Nada...nada di balor etèrno ta sosodé den bida di e kreyente individual òf den un iglesia lokal fuera di e obra di Spiritu Santu.

Nos por produsí efektonan temporal, ma nos no tin abilidad òf poder pa produsí rekompensanan etèrno, eventonan etèrno, edifikashon etèrno den bida di un iglesia òf person. Pa deklará, manera un persona a bisa, ku nos ta kere den e Tata, e Yu, i Skritura Santu—komo sifuera Skritura ta remplasá e puesto di e Spiritu den e Trinidat divino—ta un kibokashon total.

Pues, kiko hende ku ta kere den suspenshon ta kere ku Spiritu Santu a suspendé? Laga nos papia kla kla. Nos ta kere solamente ku El a suspendé ún funshon, i e funshon ei ta ku E no ta duna kreyentenan awendia e donnan spiritual milagroso, donnan manera papiamentu na lenganan, profesia i sanashon.

Di otro banda, esnan ku ta kere den kontinuashon di donnan milagroso ta kere ku e donnan milagroso a kontinuá sin interrupshon desde pentekostes. Òf otro sektanan lo bisa ku e donnan milagroso a mengua durante gran parti di e era di iglesia, ma awor a wòrdu restorá. Maske tin diferensianan den e tres ramanan di e movimiento karismátiko (pentekostalnan, karismátikonan i di tres ola), nan tur ta kere den kontinuashon di donnan milagroso i nan ta hasi uso di e mésun argumentonan den lokual nan ta skirbi òf kompartí pa defendé nan perspektiva di kontinuashon. E argumentonan prinsipal ku nan ta enfatisá pa defendé nan punto di bista, e argumentonan ku bo lo tende ku mas frekuensia ta lo siguiente.

Pa di promé, nan lo afirmá ku nunca Tèstament Nobo no ta bisa spesífikamente ku donnan milagroso a terminá durante era di iglesia. Ma e argumento ei tin balides pa ku e perspektiva kontrario, pasobra Tèstament Nobo tampoko no ta bisa spesífikamente ku e donnan milagroso a kontinuá.

Nan ta reakshoná ku un di dos argumento. Tin un par di teksto den Tèstament Nobo ku ta duna impreshon ku e donnan milagroso lo kontinuá te ora Kristu ta regresá. Nan ehèmpel favorito ta 1 Korintionan 13:10, “...ora loke ta perfekto bin, loke ta pa un parti lo wòrdu kitá.” Nan ta argumentá ku esei ke men ku e donnan di lenganan i profesia lo kaba solamente ora Kristu ta regresá. Ma, manera boso sa, tin hopi debate tokante e teksto aki i tin vários pusíbel interpretashon. Di parti di oponentenan di ambos banda di e argumento tin desakuerdo tokante kon pa interpretá e teksto ei. Nan no tin sostén legítimo pa nan doktrina i nan práktika for di e

teksto kontroversial ei. Echu ta, pa mayoria di historia di iglesia, presisamente e teksto ei tabata usá pa defendé suspenshon.

Nan di tres argumento prinsipal pa kontinuashon di donnan milagroso ta ku Tèstamènt Nobo ta papia solamente tokante e era di iglesia i p'esei e donnan ku a originá den e era aki mester kontinuá durante henter e era. Nan ta bisa ku nos ta hasi un divishon artifisial den era di iglesia, esta, era di apòstelnan i era despues di apòstelnan. Ma solamente si nan ta kere ku tin apòstel awendia riba mésun nivel di Pedro i Pablo (i mayoria karismátiko no ta kere esei) nan tambe ta hasi distinsjon den e era di iglesia i nan ta konsiderá ku apòstelnan a eksistí solamente den e era apostólíko. En realidat nan tambe ta kere den suspenshon...sikiera di un parti.

Ma e argumento mas komún ku proponentenan di kontinuashon di donnan milagroso ta trese dilanti (i esaki ta un argumento ku mi tin sigur ku boso a yega di tende, pasobra bo por tend'é tur kaminda), ta ku e 500 miòn kristiannan ku ta deklará ku nan tin eksperensiánan karismátiko, nan tur no por ta kiboká. Laga nos pensa tokante esei un ratu. Usando e mésun argumento, nos mester aseptá tur e milagernan di Iglesia Katólíko Romano tambe. Tòg tin ún bion di nan, ún bionan ku ta deklará i promové e milagernan ei, i nan historia ta ekstendé mas síglo. Echu ta ku miones, 500 mion òf ún bion persona ku ta profesá di ta kristian, por ta kiboká.

Eseinan ta e argumentonan mas komún pa kontinuashon di donnan spiritual. Mi ke pa nos konsiderá e evidensia na favor di suspenshon di donnan spiritual. Promé, nos mester ta sigur ku nos ta papia tokante e mésun kos. Nos mester definí esaki.

Suspenshon no ta nifiká (manera esnan ku ta kritiká nos ta presentá), ku Dios no ta hasi hasi nada milagroso mas. Komo pastor, ta mi plaser pa mira milagernan ku frekuensia pasobra kada biaha ku un pekadó ku ta spiritualmente morto ta haña bida, esei ta un obra milagroso di gracia divino. Apòstel Pablo ta bisa ku e úniko manera ku un pekadó siegá por bin konosé e bèrdat ta si Dios kende a bisa “Laga tin lus” ta bisa, “Laga tin lus den kurason.” Kada biaha ku un hende ta rekuperá solamente komo kontesta di orashon di pueblo di Dios kontradiendo loke médikonan a bisa, esei ta un milager divino. Dios a intervení! Pues suspenshon no ta nifiká ku Dios no ta hasi obra milagroso mas.

Suspenshon no ta nifiká ku Spiritu Santu no por skohe pa duna un abilidad milagroso na un persona awendia si E ta deseá pa hasi esei. Siendo Dios, E por hasi loke E ke, ki ora ku E ke. Si E ta skohe pa hasié, E por pèmití un persona awendia pa papia un idioma ku e nunca a studia. Ma esei lo no ta e don di Tèstamènt Nobo pasobra e lo no ta revelashon for di Dios manera e tabata e tempu ei.

Kiko anto suspenshon ke men? Nos ke men ku Spiritu Santu soberano no ta duna kreyentenan individual e donnan milagroso spiritual ku ta listá den Skritura i ku tabata presente den iglesia di promé síglo. No ta plan di Spiritu, ni ta Su patronchi normal pa duna donnan milagroso spiritual na kristiannan i iglesianan awendia manera El a hasi den tempu di e apòstelnan. Ku klousura di era di e apòstelnan, e donan ei a wòrdu suspendé komo algu normal.

Ma, naturalmente, e pregunta krusial ta dikon? Pakiko nos ta kere ku e donan milagroso di Spiritu a terminá mientras e otro funshonnan di Spiritu Santu a kontinuá? Si bo ta hasi pregunta di kreyentenan ku ta kere den suspenshon di donnan milagroso pa evidensia bíbliko, mayoria di nan lo dirigíbo na 1 Korintionan 13. I ami personalmente ta kere ku por argumentá pro suspenshon for di e teksto ei. Ma suspenshon di donnan spiritual milagroso no ta dependé di 1 Korintionan 13. Den nos tempu huntu awe mainta, mi ke kompartí ku boso shete argumento bíbliko pro suspenshon. Kada un di e argumentonan aki ta meresé su mes sermon. Onestamente bisá, algun di nan ta meresé un serie di sermon. Ma nos lo kubri tur shete awe mainta.

P'esei mi meta awe mainta no ta pa splika e argumentonan aki na plaka chikí. Esei ta impusíbel. Tampoko no ta mi meta pa kontestá tur pusíbel argumento kontra loke mi ta presentá, maske e argumentonan por wòrdu kontestá. Mi deseo awe mainta ta pa duna boso un bista general na favor di suspenshon i mi ta spera ku esaki lo enkurashá boso pa hasi mas estudio di e tópiko aki.

E promé argumento bíbliko pro suspenshon ta e ròl úniko di milagernan. Hopi evangéliko, i mi ta kere mayoria karismátiko, ta kere ku milagernan ta sosodé riba kasi kada página di historia bíbliko. En realidat, tabatin solamente tres periodo prinsipal den kua Dios a hasi milagernan dor di hòmbènan ku El a prepará. Den otro palabra, tabatin solamente tres periodo prinsipal ora Dios a duna hende poder pa hasi milagernan.

E promé periodo tabata esun di Moisés i Josué. E periodo ei a dura for di tempu di e eksodo (mas òf ménos aña 1445 B.C.) te karera di Josué a terminá mas òf ménos na aña 1380 B.C. Den otro palabra, e promé periodo di milagernan a dura mas òf ménos 65 aña.

E di dos era ku milagernan tabata komún tabata durante ministerionan di Elias i Eliseo. Kalkulando e krónologia bíbliko atrobe, nan a ministrá for di mas òf ménos 860 B.C. te ku 795 B.C. Atrobe un periodo di solamente 65 aña.

E di tres era di milagernan tabata era di Kristu i Su apòstelnan. Ta opvio ku e milagernan a kuminsá ku Su ministerio i a dura te morto di apòstel Juan, un periodo di mas òf ménos 70 aña.

Durante historia bíbliko, tempu tempu Dios a intervení ku milagernan dirèkt. Ma durante e miles di aña di historia humano, tabatin solamente mas òf ménos dos shen aña durante kua Dios a empoderá hende pa hasi milagernan. I asta e tempu ei, milagernan no a sosodé kada dia. Pakiko? Pasobra e proposito prinsipal di milagernan semper tabata pa konfirmá e kredensialnan di e mensahero ku Dios a apuntá, pa establese e kredensialnan di esun ku a papia pa Dios; no kredensialnan di un persona ku ta instruí òf ta splika Palabra di Dios manera mi ta hasi awe mainta, ma un persona ku Dios a pone Su mes palabranan den su boka. E patronchi aki a kuminsá ku e promé hasidó di milagernan, Moisés.

Mi ke pa boso bira huntu ku mi na Eksodo 6:28. Akinan Moisés ta konta tokante su yamada i ta elaborá. “Awor a sosodé ku dia SEÑOR a papia ku Moisés na tera di Egipto, SEÑOR a papia ku Moisés, bisando: ‘Ami ta SEÑOR. Bisa Farao, rei di Egipto, tur loke Mi bisabo.’ Ma Moisés a bisa dilanti di SEÑOR: ‘Mira, mi no ta papia bon; kon anto Farao lo skuchami?’ E ora ei SEÑOR a bisa Moisés: ‘Mira, Mi ta hasibo manera Dios pa Farao, i bo ruman Aaron lo ta bo profeta. Bo mester papia tur loke Mi ordenábo, i bo ruman Aaron mester papia ku Farao...’”

Dios ta bisa, “Bo no ta kere ku Mi por empoderábo? Ku Mi por kumpli dor di bo loke Mi ta deseá? Mi ta bai dunábo Aaron. Abo lo ta manera Dios pa Aaron, e lo ta manera bo profeta. Mi lo pone palabranan den bo boka, abo lo pone nan den su boka, i e lo papia ku Farao.”

Awor ban bèk na kapítulo 4 pasobra ei e ta elaborá riba esaki un tiki tambe. Eksodo 4:15. “I abo mester papia kuné i pone e palabranan den su boka; i Ami, si Ami, lo ta ku bo boka i ku su boka, i lo Mi siña boso kiko boso mester hasi. Ademas, e lo papia ku e pueblo pa bo; i lo sosodé ku e lo ta manera boka pa bo, i abo lo ta manera Dios p’è.”

Ripará ku den tur dos teksto, pa Aaron ta Moisés su profeta, e no por papia di su mes. E mester papia solamente e palabranan di Moisés, kende tabata na lugá di Dios p’è. Esei ta loke ta nifiká pa ta un profeta. E palabranan di Dios mes poné den bo boka. Ta p’esei ora Dios a yama Jeremias den Jeremias 1, El a bisa, “Mi a pone Mi palabranan den bo boka.”

Ma kon e hendenan por sa si e hòmber ku a bisa ku e ta un profeta di bèrdat ta papia Dios Su mes palabranan? Moisés, e promé profeta, a enfrentá e problema aki. I el a trese esaki dilanti serka Dios na komienso di kapítulo 4. “E ora ei Moisés a kontestá i a bisa: ‘Suponé ku nan no kier keremi, ni tende na loke mi ta bisa. Suponé ku nan bisa: “SEÑOR no a parsé na bo.”’” Kon nos por sa ku bo ta Dios Su profeta? Ku e palabranan den bo boka ta palabranan di Dios? “SEÑOR a bis’è, “Kiko bo tin den bo man ei?”

Boso ta kòrda e storia. Dios a bisa, “Bent’è (e bara) abou na suela. I Moisés a bent’è abou na suela i el a bira un kolebra, i Moisés a hui p’è. Ma SEÑOR a bisa Moisés: ‘Saka bo man gar’è na su rabu. Asina Moisés a saka su man gar’è. I e kolebra a bira un bara den su man.’” I esaki ta loke Dios ta bisa. “Pa nan kere ku SEÑOR (Yahweh), e Dios di nan tatanan, e Dios di Abraham, e Dios di Isaak i e Dios di Jakòb, a paresé na bo.” Ta p’esaki mi ta dunábo e abilidadat pa hasi milagernan.

Dios a enfatisá esaki ku dos otro milager den e vèrsikulonan ku ta sigui. Pues, komprendé ku Dios a empoderá Moisés pa hasi milagernan pa solamente un proposito, i esei tabata pa demonstrá ku Moisés ta Dios Su profeta, i ku Moisés su mensahe ta Dios Su mes palabranan. Moisés a wòrdu aseptá universalmente komo Dios Su profeta. I loke el a skirbi tabata literalmente e palabranan di Dios i tabata aseptá literalmente komo palabranan di Dios. Pakiko? Pasobra e poder pa hasi milagernan a konfirmá su proklamashon ku e ta papia pa Dios. Esaki ta e proposito kontinuo pa milagernan dor di henter Tèstamènt Bieu.

Pensa, por ehèmpel, di otro profetanan di Tèstamènt Bieu. Moisés a skirbi ku Dios lo lanta hòmbènan manera e pa papia pa Dios, otro profetanan. Deuteronomio 18:15, “SEÑOR bo Dios lo lanta pa bo un profeta manera ami for di meimei di bo, for di bo paisanonan; boso mester skucha na djé.” Klaramente e profesia di un profeta tabata kumplí prinsipalmente dor di Mesias. Ma ta igualmente opvio ku Moisés tabata deskribí un institushon di profesia ku tabata aktivo den su era segun Numbernan 11:29. I esaki lo kontinuá. P’esei aki den Deuteronomio, Moisés a duna tres kriteria pa diserní un profeta bèrdadero for di un profeta falsu.

Ripará 18:21-22. E ta bisa ku e pronostikashonnan di un profeta bèrdadero semper ta sosodé. Esei ta kriteria number ún...e pronostikashonnan di un profeta bèrdadero semper ta sosodé. Esaki ta kon boso por sa si e profeta tin e bèrdadero palabranan di Dios. Den Deuteronomio 13:1-5, Dios ta bisa ku E lo skohe pa revelá e profeta bèrdadero. E lo hasi esei dor di dun’è poder pa hasi milagernan, manera El a hasi ku Moisés. Den Deuteronomio 13, E ta bisa ku asta si e ta hasi milagernan, e di tres kriteria (pa sa si e profeta ta bèrdadero) ta ku e profeta su mensahe semper mester ta kompletamente di akuerdo doktrinal ku revelashon anterior.

Pues, Moisés tabata un profeta, i Dios a dun’è e abilidad pa hasi milagernan pa demonstrá ku e ta papia Dios Su mes palabranan. Tabata meskos ku e profetanan ku lo siguié. P’esei den Tèstamènt Bieu, solamente profetanan, solamente esnan ku a papia na un forma outoritario i infalibel pa Dios a hasi milagernan pasobra milagernan tabata nan kredensial.

E milager mas famoso fuera di Pentatuk por wòrdu hañá den ministerio di Elias den 1 Reinan 18:36 ora el a pidi pa kandela kai riba e altar na Seru Karmelo. Skucha loke El a bisa den su orashon. Esaki ta 1 Reinan 18:36, “profeta Elias a yega serka i a bisa: "O SEÑOR (Yahewh), e Dios di Abraham, Isaak i Israel, laga ta konosí awe ku ta Abo ta Dios na Israel, i ku ami ta Bo sirbidó i ku mi a hasi tur e kosnan aki konforme Bo palabra.” Dios demonstrá ku mi ta un profeta outéntiko.

Ora nos ta yega na Tèstamènt Nobo, nos ta deskubrí e mésun patronchi. Sin duda, nos Señor, tabata a kumplimentu mas kompleto di e profeta ku Moisés a primintí den Deuteronomio 18. E tabata e gran profeta, e profeta ku e mensahe mas grandi i ku e deklarashonnan mas grandi. Pues, no ta un sorpresa ku E lo hasi mas milager ku tur otro hende den historia ku tabata empoderá pa hasi milagernan. Ma nèt manera tabata e kaso ku Moisés i e otro profetanan di Tèstamènt Bieu, e proposito prinsipal di Hesus Su milagernan tabata pa konfirmá Su kredensialnan komo Dios Su mensahero último i final ku lo papia infalibelmente pa Dios.

E punto aki ta sentral pa ku apòstel Juan den su evangelio. Bira huntu ku mi na Juan su evangelio i lagami muestra algun ehèmpel. Hesus ta papia den Juan 5:36, “Ma e testimonio ku Mi tin ta mas grandi ku esun di Juan; pasobra e obranan ku e Tata a dunaMi pa kumpli kuné, e mésun obranan ku Mi ta hasi, ta duna testimonio di Mi ku ta e Tata a mandaMi.” “Mira loke Mi ta hasi, mira e saniamentu, mira e milagernan. Eseinan ta testifiká ku Mi ta Dios Su mensahero final.

Juan 6:14, “Ora ku e hendenan a mira e milager ku Jesus a hasi (duna kuminda na 5000+ hende)...” Kiko e milager-señal a demonstrá? Esaki tabata nan konklushon: “Esaki bèrdaderamente ta e Profeta ku mester a bin den mundu.” Den kapitulo 7 vèrsikulo 31, “Ma hopi di e multitud a kere den djE; i nan tabata bisa: ‘Ora ku e Cristo bin, lo E hasi mas milager ku esnan ku e Hòmber aki ta hasi?’”

Juan 10:24, “E hudiunan anto a bin para rònt di djE i tabata puntr’E: ‘Kuantu tempu mas Bo ta tene nos na duda? Si Bo ta e Cristo, bisa nos frankamente.’ Jesus a kontestá nan: ‘Mi a

bisa boso, i boso no ta kere; e obranan ku Mi ta hasi den e nòmber di Mi Tata, ta esakinan ta duna testimonio di Mi. Ma boso no ta kere, pasobra boso no ta pertenesé na Mi karnéan.”

Den vèrsíkulo 37 di e mésun kapítulo, “Si Mi no ta hasi e obranan di Mi Tata, no kereMi; ma si Mi ta hasi nan, maske boso no ta kereMi, kere e obranan, pa boso por sa i komprendé ku e Tata ta den Mi i Ami den e Tata.”

Hesus Su milagernan no tabata prinsipalmente un hèrmènt pa evangelismo efektivu. Di bèrdat, milagernan no ta un hèrmènt efektivu pa evangelismo. El a bisa ku asta si un persona lanta for di morto, si nan no ta despuesto pa skucha Moisés i e profetanan, nan lo no kere. Meta prinsipal di Hesus Su milagernan no tabata pa aliviá sufrimentu humano, maske nos ta opservá den Su milagernan Su gran kurason di kompashon. E motibu sentral ku Spiritu Santu a empoderá Hesus pa hasi milagernan tabata pa konfirmá ku loke El a papia tabata e palabranan di Dios mes, ku E tabata tur loke El a deklará ku E ta.

Riba dia di Pentekostes, un dia di milagernan, Pedro a re-enfatisá ku esei tabata Hesus Su propósito pa milagernan. Mira Echunan 2:22, “Jesus di Nazaret, un Hòmber aprobá pa Dios boso dilanti ku milagernan, maraviyanan i señalnan ku Dios a hasi pa medio di djE meimei di boso, manera boso mes sa.” Esei tabata e motibu pa Su milagernan.

Hesus mes no solamente a hasi milagernan, ma El a duna e mésun poder na e apòstelnan i nan milagernan a sirbi presisamente e mésun propósito. Mira Echunan 14:3, “P’esei nan a keda ayanan pa basta tempu, papiando ku tur frankesa, ku konfiansa den Señor, Kende tabata duna testimonio na e palabra di Su grasia, pèrmitiendo ku milagernan i maraviyanan tabata wòrdu hasi pa medio di nan man.”

Outor di Hebreonan 2:3-4 ta hasi e mésun énfasis: E mensahe di salbashon “a wòrdu konfirmá na nos dor di esnan ku a tende, mientras ku Dios tambe tabata duna testimonio huntu ku nan (esta e apòstelnan), tantu pa medio di señalnan komo pa medio di maraviyanan i pa medio di varios sorto di milagernan i pa medio di donnan di Spiritu Santu segun Su mes boluntat.”

Intenshon di e donnan milagroso ku a kompañá e apòstelnan tabata pa konfirmá ku nan tabata Dios Su intrumèntnan genuino pa revelashon, nèt manera tabata e kaso ku Moisés, profetanan di Tèstament Bieu, Elias i Eliseo, i Hesus mes.

Esei ta un korida rápido. Muchu mas por wòrdu bisá tokante esaki. Ma debí ku e patronchi aki ta konsistente dor di Skritura, ta rasonabel pa pensa ku morto di e apòstelnan, ku fin di Dios Su revelashon, ku morto di esnan ku a papia Dios Su mes palabranan, lo resultá den klousura di kapasidat humano pa hasi milagernan tambe...nèt manera a sosodé despues di Moisés i Josué pa shenes di aña, i nèt manera a sosodé despues di Elias i Eliseo.

B.B. Warfield a skirbi, “Milagernan no ta aparese riba e páginanan di Skritura kon ku ta, aki aya, sin un rason kla. Nan ta pertenesé na periodonan di revelashon i ta aparese solamente ora Dios ta papia ku Su pueblo pa medio di mensaheronan konfiabel, deklarando Su propositonan grasiioso. E kantidat di milager desplegó den iglesia apostólisko ta demonstrá e rikesa di revelashon den e era apostólisko. I ora e periodo aki di revelashon ta klousurá, e periodo di milagernan tambe a pasa naturalmente.” Skritura ta dirigí nos pa antispá final di donnan milagroso pa motibu di e ròl úniko ku milagernan semper a hunga, komo evidensia ku un persona ta papia Dios Su mes palabranan.

Un di dos argumento—ligá ku e promé argumento—ta fin di e don di apostolado. Na dos lugá den Tèstament Nobo, Pablo ta referí na e apòstelnan komo un regalo ku Kristu a duna Su iglesia. E promé teksto ta 1 Korintionan 12, meimei di e sekshon tokante donnan spiritual. 1 Korintionan 12:28, “I Dios a nombra den iglesia, primeramente apòstelnan, di dos profetanan, di tres siñadónan, despues milagernan, despues donnan di kura hende, di yudansa, di atministrashon, di varios sorto di lenga.” Aki pablo ta demonstrá e variedat ku Spiritu Santu a krea den e kurpa. Nèt manera e kurpa fisiko tin un variedat di miembro, asina Spiritu a kapasidat diferente parti di e kurpa na un manera úniko. E tambe ta inkluí apòstelnan.

Maske tur don spiritual no ta puesto, tur puesto den Tèstament Nobo ta donnan pa iglesia di Kristu. Kristu ta hasi esaki opvio den Efesionan 4:7, splikando kon iglesia mester funshoná.

“Ma na kada un di nos grasia a wòrdu duná konforme e midí di e don di Cristo. P’esei ta wòrdu bisá: ‘Ora ku El a subi bai den haltura, El a hiba un ehérsito di katibunan komo katibu, i El a duna donnan na hende.’”

Anto den vèrsíkulo 11, E ta bisa kiko e donnan ta. “I El a duna algun komo apòstel, i algun komo profeta, i algun komo evangelista, i algun komo pastor i siñadó.” Un di e donnan Kristu a duna Su iglesia tabata apòstelnan. Nan tabata un don temporal. Mayoria kristian i mayoria karismátiko evangéliko ta di akuerdo ku no tin mas ku diesdos apòstel manera Pablo. Pakiko? Pasobra pa ser un apòstel—un bèrdadero apòstel—bo mester kumpli ku tres requisito.

Bo mester ta testigu di e resurekshon di Kristu. Den Echunan 1, e disipelnan tabata disidí kiko pa hasi despues di Judas su suisidio. Den Echunan 1:22, “kuminsando for di e boutismo di Juan te na e dia ku El a wòrdu tumá for di nos, un di nan bira testigu huntu ku nos di Su resurekshon” Bo mester ta testigu di e bida di Kristu i Su resurekshon.

Pa di dos, pa ser un apòstel, Kristu mester a apuntá bo personalmente. Den Echunan 1:2, e eskritor a referí na e apòstelnan komo esnan ku El a skohe. I asta na fin di kapitulo 1, ora nan tabata buska un remplante pa Judas, den nan orashon nan a bisa Dios, “mustra kual di e dosnan aki Abo a skohe.”

Terseramente, pa ser un apòstel bèrdadero, bo mester por hasi milagernan. Den Mateo 10:1-2, Hesus “a yama Su diesdos disipelnan serka djE, El a duna nan outoridat riba spiritunan impuru, pa saka nan afó, i pa kura tur sorto di enfermedat i tur sorto di malesa”...no doló di lomba so.

Esakinan ta e diesdos apòstelnan. Nos ta yega na 2 Korintionan 12:12. E ta bisa, “E señalnan di un apòstel berdadero a wòrdu hasi meimei di boso ku tur pèrseveransia, pa medio di señalnan i maraviyanan i milagernan.” Pa ta un apòstel, bo mester por hasi milagernan. Mirando e tres kalifikashonnan bo ta realisá inmediatamente ku no tin ningun hende bibu awe ku ta kumpli ku tur tres kalifikashon. Pues, sikiera un don di Tèstament Bieu, e don di apostolado, a terminá. Esei ta nifiká ku e obra di Spiritu Santu ta hopi otro awe for di e tempu di e apòstelnan pasobra un di e demonstrashonnan mas milagroso di Spiritu, e don di apostolado, a desparesé ora era di e apòstelnan a klousurá.

Tambe mi ta kere ku ta importante ku e don di apostolado a wòrdu suspendé sin un deklarashon kla den Tèstament Nobo ku e lo terminá. Esei ke men ku no ta impusibel ni improbabel ku otro kambionan importante a tuma lugá ora e era di apòstelnan a klousurá. Una bes bo ta di akuerdo ku no tin apòstelnan awendia riba mésun nivel di Pedro i Pablo, anto bo a atmití ku tin un cambio mayó den e donnan ku Spiritu Santu a duna den e era di apòstelnan for di e era despues di apòstelnan. Di bèrdat, e un don den Tèstament Nobo ku ta ligá ku milagernan ku mas frekuensia, e don di apòstelado, a wòrdu suspendé.

E di tres argumento pro suspenshon ta e naturalesa fundamental di apòstelnan i profetanen di Tèstament Nobo. Tèstament Nobo ta identifiká apòstelnan i profetanen komo e fundeshi riba kua iglesia ta konstruí.

Un di e alegrianan di mi bida tabata pa invert tres aña ku mi kongregashon pa studia dor di e buki di Efesionan. Den Efesionan 2, Pablo ta duna un komprendementu fundamental di iglesia, un hende nobo ta krea for di paganonan i hudiunan i uní, tin pas individual ku Dios apesar di tur e diferensianan ku a distinguí nos for di otro promé, i El a trese nos huntu den Kristu. Na fin di e gran kapitulo, e ta pinta tres portrèt di iglesia. Den vèrsíkulo 19 e ta bisa ku nos ta suidananan di e reino di Dios. Tambe e ta bisa den vèrsíkulo 19, “boso ta di e hendenan di kas di Dios.”

Anto e ta mustra e di tres portrèt den vèrsíkulo 20, “ku a wòrdu trahá riba e fundeshi di e apòstelnan i e profetanen, di kual Cristo Jesus mes ta e piedra-di-skina prinsipal, den Kende henter e edifisio, siendo bon hinká den otro, ta krese pa bira un tèmpep santu den Señor; den Kende boso tambe ta wòrdu trahá konhuntamente pa ta un lugá-di-biba pa Dios den Spiritu.” E ta bisa, “Boso no ta solamente suidananan di reino di Dios, boso no ta solamente miembronan

di famia di Dios, ma boso ta manera piedranan individual pegá ku hopi kuidou banda di otro dor di Dios pa forma un struktura. E edifisio ei ta un tèmpep den kua nos Dios lo ser adorá.”

Ma ripará kon e ta deskribí e edifisio den vèrsíkulo 20. Iglesia ta konstruí riba e fundeshi di apòstelnan i profetanan. No tin pregunta tokante e apòstelnan. Ma ken ta e profetanan aki? Pasobra e vèrsíkulo aki tin implikashon grandi, algùn karismátiko a inventá un interpretashon nobo ken e profetanan ta. Algun karismátiko a argumentá ku Pablo tabata ke men ku iglesia ta fundá riba e fundeshi di apòstelnan i e profetanan di Tèstament Bieu. Ma e konteksto ta indiká kla ku Pablo ta referí na profetanan di Tèstament Nobo. Ripará un poko vèrsíkulo despues (3:5) e ta papia tokante e *MUSTERION*, e misterio ku a wòrdu revelá n’è—i e ta mayordomo di e misterio. E ta bisa, “kual den otro generashonnan (den tempu di Tèstament Bieu) no a wòrdu hasí konosí na e yunan di hende, manera el a wòrdu revelá awor na Su apòstelnan i profetanan santu.” E ta papia di profetanan di Tèstament Nobo.

Otro karismátiko ta kambia e sintido di Efesionan 2:20 pa bisa algu asina: “ku a wòrdu trahá riba e fundeshi di e apòstelnan kendenan ta e profetanan.” Den otro palabra, e apòstelnan i profetanan ta e mésun grupo. Tin un motibu lingwístiko pa rechasá e interpretashon ei. Tambe tin un motibu for di e konteksto. E konteksto ta indiká kla ku e apòstelnan i profetanan ta dos grupo distinto. Den 4:11, e ta bisa, “I El a duna algun komo apòstel, i algun komo profeta,” dos grupo diferente.

Pues, laga nos resumí loke nos a deskubrí. Den Efesionan 2:20, Pablo a siña ku e revelashon ku a bin dor di e apòstelnan i dor di e profetanan di Tèstament Nobo ta fundeshi di iglesia. Iglesia ta konstruí riba e fundeshi ei. E portrèt ta un fundeshi ku ta kompletamente kla pa traha e edifisio riba dje. E fundeshi ta kompletá. Awor ta traha e edifisio riba e fundeshi ku ya kaba ta kompletá. Esaki ta e mésun portrèt ku Pablo a usa den 1 Korintionan 3 unda e ta papia tokante e lidernan di iglesia di Korintio komo un edifisio. Mientras Dios ta obra, nan ta traha e edifisio ku ta wòrdu konstruí pa síglonan. Awe nos ta traha. Ma e fundeshi ya kaba ta poné dor di e apòstelnan i profetanan, dor di revelashonnan ku nan a haña. Una bes Dios Su revelashonnan na e apoòstelnan i profetanan di Tèstament Nobo tabata kompletá, e fundeshi tabata kompletá. Nan trabou tabata kompletá. Nan ròl tabata kla. Esei ta klaramente bèrdat di e apòstelnan, manera nos ya kaba a mira. Nan no ta eksistí mas. I awor aki den Efesionan 2, Pablo ta bisa ku e ròl di profetanan tambe tabata fundamental i tambe a wòrdu kompletá.

Nos no mester pensa ku mas apòstel lo aparecé. Nos no mester antisipá mas profeta. Nos no mester spera mas revelashon.

E di kuater argumento pro suspenshon ta e naturalesa di donnan milagroso den Tèstament Nobo. Si Spiritu Santu ainda ta duna kreyentenan awendia donnan milagroso, nan lo ta e mésun donnan ku nos ta haña den Tèstament Nobo. Sinembargu, e donnan ku karismátikonan ta bisa ku nan tin awendia no ta parse mes e donnan den Tèstament Nobo. Pensa, por ehèmpel, tokante e don di lenganan. Segun Lukas den Echunan 2, e don den Tèstament Nobo tabata e abilidad na Pentekostes pa paia un idioma humano konosí. Skucha Echunan 2:7-8, “I nan a keda asombrá i straña, bisando: ‘Mira, tur esakinan ku ta papia, no ta galileo nan ta? I kon anto nos kada un ta tendé nan papia den nos mes lenga den kual nos a nase?’” Nos mes lenga—esakinan tabata idiomanan konosí, e idiomanan den kual nan a nase.

E di dos biaha ku nos ta topa lenganan den e buki di Echunan ta 11:15, ora Pedro a reportá tokante e don di lenganan ku Dios a duna na Cornelio i e hendenan di su kas despues ku nan a kombertí. Esaki ta loke Pedro ta bisa den Echunan 11:15, “I ora mi a kuminsá papia, Spiritu Santu a baha riba nan, meskos ku El a baha riba nos den prinsipio.” Pedro ta bisa ku tabata eksaktamente meskos ku a sosodé ku nan. Pues, loke a sosodé na kas di Cornelio ta eksaktamente loke a sosodé na Pentekostes, i loke a sosodé na Pentekostes ta opvio.

Ora Lukas ta reportá tokante e di tres episodjo di papiamentu na lenganan den Echunan 19, tin absolutamente nada den e konteksto ku ta indiká ku tin un diferensia for di loke a sosodé den Echunan 2 i Echunan 10.

I kòrda loke Lukas tabata sa. Ora Lukas a skirbi e buki di Echunan, e tabata sa ku seis òf shete aña promé Pablo a skirbi 1 Korintionan 14. E tabata sa loke tabata sosodé na Korintio, i tòg Lukas a definí papiamentu na lenganan komo “tende nan papia den nos mes lenga” òf nos mes dialekto. E no a menshoná algu ekstátiko. Esei tabata e don di Tèstament Nobo— papiamentu na un idioma òf dialekto konosí. Kompará esei ku lenganan awendia ku ta papiamentu ekstátiko. No ta e mésun kos.

Admas, e don di lenga den Tèstament Nobo, inkluiendo 1 Korintionan 14, tabata un don públiko, deseñá pa edifikashon di otronan. Mester tabatin un persona pa interpretá. Di otro banda, lenganan awendia, ta prinsipalmente un idioma privá pa orashon. Pues, papiamentu na lenganan awendia tin kasi nada en komún ku e don di Tèstament Nobo ku eksepshon di e palabra “lenga”.

Òf konsiderá e naturalesa di e don di profesia. Esaki tambe ta diferente. E don di Tèstament Nobo i e don di profesia awndia ta dos kos distinto. Kontrario di doktrina karismátiko, ningun teksto ta hasi dinstinshon entre profetanan di Tèstament Bieu i profetanan di Tèstament Nobo. En kontraste, Tèstament Nobo ta mustra ku profesianan di Tèstament Bieu i di Tèstament Nobo ta igual. No tin diferensia den uso di e palabra. Ora bo ta studia dor di e buki di Echunan, ripará kada biaha ku e palabra “profeta” òf “profesia” ta aparesé. Bo lo mira ku e profetanan di Tèstament Bieu i e profetanan di Tèstament Nobo ta menshoná bruhá den otro, sin hasi dinstinshon entre nan. Esei ta nifiká ku nèt manera e profetanan di Tèstament Bieu a papia revelashon infalibel for di Dios, e profetanan di Tèstament Nobo a hasi meskos. Den Tèstament Bieu hende mester a evaluá e palabranan di e profetanan a base di revelashon anterior. Ma una bes e profesia tabata aprobá, manera nos a mira den Echunan 2, nan profesianan tabata agregá na e siñansa di e apòstelnan pa forma e fundeshi di iglesia. Ta interesante ku den Echunan 21:11, un di e tekstonan favorito di karisátikanan pa defendé e idea ku profesia di Tèstament Nobo ta diferente for di profesia di Tèstament Bieu, profeta Agabo ta usa presis e mésun introdukshon ora e ta bisa, “Esaki ta loke Spiritu Santu ta bisa...” Ningun diferensia.

Pues, profesia den Tèstament Nobo ta revelashon dirèkt, infalibel. Esei no ta loke e movimiento karismátiko di síglo 21 ta yama profesia. E defensor prinsipal di profesianan karismátiko awendia, Wayne Grudem, ta atmití ku ta inkorekto pa introdusí profesianan den e movimiento karismátiko awendia ku e palabranan, “Asina Señor ta bisa.” Na lugá di esei, e ta surgerí pa introdusí profesianan den un iglesia karismátiko awendia ku e palabranan, “Mi ta kere ku esaki ta loke Spiritu Santu ta bisa.” Esei no ta e don den Tèstament Nobo.

Konsiderá un otro ehèmpel, e don di sanashon. Den Tèstament Nobo ora un persona ku e don di sanashon di Tèstament Nobo a usa su don, e resultado tabata kuramentu kompleto, instantaneo, permanente, opvio, tur klase di enfermedat. E supuesto sanashonnan awendia di sanadónan ta lo kontrario di e milagernan ei den Beibel. Nan no ta kompleto. Nan ta temporal. No por verifiká nan.

E eksibishonnan ku ta yamá donnan milagroso awendia no ta e mésun donnan di Tèstament Nobo. Ta interesante ku asta hopi karismátiko ta di akuerdo. Por ehèmpel, skirbiendo tokante profesia, Wayne Grudem a bisa, “Ningun kreyente karismátiko responsabel awendia ta kere ku profesia ta revelashon for di Dios infalibel i sin eror.” Grudem a sigui bisa, “Tin testimonio kasi unánimo for di tur parti di e movimiento karismátiko ku profesia awendia ta impuru i lo kontené elementonan ku no mester obedesé ni konfia.”

Nos ta apresíá nos ruman, ma si esei ta e stèndert, si esei a sosodé durante era di Tèstament Bieu, e profeta lo ta morto. Teólogo di e di Tres Ola, Jack Deere, a atmití den su buki *Surprised By the Power of the Holy Spirit*, ku karismátikonan moderno no ta bisa ku nan tin e kalidat di donnan i abilidadat milagroso apostóliko. Ora karismátikonan ta deklará ku nan milagernan ta riba mésun nivel di e donnan di Tèstament Nobo (i tin esnan ku ta hasi deklarashon deskabayá di, por ehèmpel, brasa òf pia restorá, òf resurekshonnan), kasi semper e deklarashonnan ku nan a tende via via, ku no wòrdu verifiká. Pues, e donnan praktiká dor di karismátikonan awendia simpelmente no ta meskos ku e donnan di Tèstament Nobo, i esei ta pasobra nan no ta donnan di Tèstament Nobo.

E di sinku argumento pro suspenshon ta e testimonio di historia di iglesia. Laga nos kuminsá ku historia di iglesia den Tèstamènt Nobo. E práktika di donnan milagroso a mengua asta durante e periodo di apòstelnan. Pentekostes i e eventonan di Echunan 2 a sosodé dies dia despues di asenshon di nos Señor. E di dos biaha ku lenganan ta menshoná (Echunan 10:46) ta sosodé durante e siguiente dieskuater aña, promé ku morto di Santiago na aña 44 A.D. E di tres biaha ku lenganan ta menshoná ta den Echunan 19:6. Esaki a sosodé durante promé parti di Pablo su ministerio na Efeso...den promé parti di e di seis dékada A.D.

Promé Korintionan, e úniko buki fuera di Echunan ku ta papia tokante lenganan tabata skirbi na aña 55 òf 56 A.D. Si bo ta pone e bukinan di Tèstamènt Nobo den e òrdu krónologiko ku nan a wòrdu skirbi, 1 Korintionan tabata solamente e di kuater karta inspirá ku Pablo a skirbi, despues di Galationan i 1 i 2 Tesalonisensenan. Despues di 1 Korintionan, Pablo a skirbi nueve karta kanóniko mas pa seis diferente iglesia. Nunka e don di lenganan ta menshoná den e kartanan ei. Den e kartanan pastoral (1 i 2 Timoteo i Tito), e bukinan skirbí serka klousura di Pablo su ministerio pa duna instruksjon permanente pa ministerio despues di e era apostólíko, ningun don milagroso ta menshoná.

Esaki ta yega na un punto kulminante den e buki di Hebreonan. Hebreonan 1:1, “Dios, despues ku El a papia hopi tempu pasá ku e tatanan pa medio di e profetanan, na hopi okashon i na varios manera den e último dianan aki ” (un ekspreshon hudíu pa e tempu di e Mesias), “a papia ku nos pa medio di Su Yu.” Dios Su último palabra ta dor di Su Yu i esnan ku El a apuntá. Ta p’esei, ora bo ta yega na Hebreonan 2:1, e eskritor ta bisa, “Pa e motibu aki” (pasobra Dios ta Outor di e mensahe), “nos mester paga muchu mas atenshon na loke nos a tende.” I e ta sigui argumentá ku si e kastigu pa desobediensia pa ku e promé aliansa duná pa medio di angelnan tabata severo, kuantu mas severo lo ta e kastigu si nos neglighá e mensahe di e aliansa nobo duná pa Señor mes—tantu mas superior ku angelnan.

Hebreonan 2:3, “Kon nos lo skapa si nos neglighá un salbashon asina grandi?” Lagámi kòrdá boso ku e buki aki, e buki di Hebreonan, kasi sigur tabata skirbi nèt promé ku destruksjon di e tèmpl na Jerusalèm na aña 70 A.D. Esei ta duna e kronologia. Mi ke pa boso ripará kon e outor di Hebreonan ta referí na loke ta milagroso.

E ta bisa ku e mensahe di salbashon—e último palabra di Dios—tabata papiá promé dor di Señor. Esei ta e promé generashon, Señor mes. Anto tin e di dos generashon den e versíkulo aki. E mensahe “a wòrdu konfirmá na nos dor di esnan ku a tende.” Eseinan ta e apòstelnan. E eskritor di Hebreonan ta inkluí su mes den e di tres generashon, “nos”. I e ta bisa di e di dos generashon, e apòstelnan (2:4), “Dios tambe tabata duna testimonio huntu ku nan” (no ku nos) “tantu pa medio di señalnan komo pa medio di maraviyanan i pa medio di varios sorto di milagernan i pa medio di donnan di Spiritu Santu segun Su mes boluntat.” Atròbe, nèt promé ku aña 70 A.D., e eskritor di Hebreonan ta bisa ku algu a sosodé e tempu ei, i ku esaki ta awor. Esei tabata algu ku Señor i e apòstelnan a hasi i nos ta testigu di esei.

Den e kronologia di historia di iglesia den Tèstamènt Nobo, boso por ripará asta promé ku Skritura tabata kompletá, e donnan milagroso ya kaba a kuminsá mengua. E milagernan ku tabatin intenshon pa konfirmá e apòstelnan i nan mensahe ya kaba a kuminsá desparesé. Esei ta e realidat di e relato históriko di Tèstamènt Nobo.

Despues di historia di Tèstamènt Nobo, nos ta deskubrí ku e testimonio di iglesia tabata eksaktamente meskos tantu den loke nan a siña komo loke nan a praktiká: es ta ku e donnan milagroso a terminá ku e era di e apòstelnan.

Lo siguiente ta djis un poko ehèmpel tumá for di diferente era di historia di iglesia. Segun Juan Crisóstomo, un gran studiante di Skritura den e di kuater siglo, “Un Korintionan i e donnan ei, ta hopi skondi, ma esei ta produsí dor di nos ignoransia di e echunan na kua e ta referí i dor di e echu ku nan ta suspendé. Nan tabata sosodé den pasado, ma no ta sosodé mas.” Agustín, skirbiendo na final di siglo kuater òf komienso di siglo sinku, a bisa, “Den tempunan antiguo, Spiritu Santu a baha riba esnan ku a kere i nan a papia na lenganan ku nan no a siña—

manera Spiritu a duna nan abilidad pa papia.” Esei ta algu ku a sosodé den pasado i no ta sosodé mas.

Den era di e Reformashon, Martin Lutero a skirbi, “E derame visíbel aki di Spiritu Santu tabata nesario pa establesementu di e iglesia antiguo, meskos ku e milagernan ku a kompañá e donnan di Spiritu Santu. Una bes iglesia tabata establese i tresé na publisidat dor di e milagernan aki, e demonstrashon visible di Spiritu Santu a stòp.” Juan Calvino, “E don di sanashon, manera e otro milagernan ku Señor a deseá pa trese dilanti, a desparesé pa hasi predikamentu di e evangelio maraviyoso pa semper.”

Jonathan Edwards a skirbi, “Di e donnan ekstraordinario, nan a wòrdu duná pa funda i establese iglesia den mundu. Ma despues ku kanon di Skritura a wòrdu kompletá i iglesia kristian kompletamente fundá i establese, e donnan ekstraordinario a terminá.” Charles Hadon Spurgeon a bisa, “E donnan milagroso di antes a apartá for di nos.” B.B Warfield a skirbi, “E donnan aki tabata eksklusivamente pa outentifikashon di e apòstelnan. Nan tabata parti di e kredensialnan di e apòstelnan komo esnan outorisá pa Dios pa funda iglesia. Nan funshon tabata limitá eksklusivamente na iglesia apostóliko i di nesidad nan a desparesé ora e era ei a kaba. No por spera kontinuashon di e obranan milagroso, ku ta indikashon di Dios Su poder revelatorio. Di bèrdat nan no ta kontinuá despues di finalisashon di revelashon.”

Eseinan ta algun sita so. Maske ta bèrdat ku tabatin rapòrt aki ayá di kosnan milagroso dor di historia di iglesia, tin testimonio konsistente di lidernan prinsipal di iglesianan tokante donnan milagroso, ku nan a klousurá ku finalisashon di e era apostóliko.

Frankamente, esaki ta okashoná un problema grandi pa nos amigunan ku ta kere ku donnan milagroso a kontinuá. Manera Sinclair Ferguson a ekspresá den su tremendo buki tokante Spiritu Santu, “kontinuashon no ta proveé splikashon teológiko konvensiente pa e desaparishon di sierto donnan durante mayoria di historia di iglesia. No tin manera pa splik’é.”

E di seis argumento pro suspenshon di donnan milagroso ta e sufisiensia di Skritura. Mi lo mensioná esaki en korto. E kanon di Skritura a será ku e skirbimentunan di e apòstelnan i nan kompañeronan outorisá. Tèstament Nobo ta siña den hopi teksto ku resultado di Dios Su revelashon ta ku Skritura ta todo-sufisiente. Dos Timoteo 3:16, “Tur Skritura ta inspirá pa Dios i ta útil pa siñansa, pa reprimimentu, pa korekshon, pa eduká den hustisia, pa e hende di Dios por ta perfekto, ekipá pa tur bon obra.” Nada mas ta hasi falta. E hende di Dios no tin mester di revelashon adishonal for di Dios. E tin tur revelashon. Hesus no ta yama òf ekipá dor di bukinan popular di siglo 21. Na lugá di esei, E ta yama i siña pa medio di Su Spiritu dor di un Buki dos òf tres mil aña bieu. Spiritu Santu ta papia solamente dor di e Palabra inspirá.

Na aña 1539, Lutero komentando tokante Salmo 119 a skirbi esaki, “Dios ke dunábo Su Spiritu solamente dor di e Palabra eksterno.” Lutero a gusta e ekspreshon “e Palabra eksterno”. Dios a duna nos un Buki, i e no ta suphetivo. E ta fuera di nos. E ta konsistí di palabranan i frasenan i paragrafnan ku nos por analisá i lesa i studia. E ta eksterno for di nos. Nos no mester duda si e mensahe den nos mente ta bin for di Dios si òf nò. Nos tin e mensahe di Dios ya kaba. Lutero tambe a skirbi, “Laga esun ku ke tende Dios papia, lesa Skritura santu.”

Tin un di shete argumento pa suspenshon—e argumento final, i esei ta e reglanan ku Tèstament Nobo a pone pa donnan milagroso. Mira 1 Korintionan 14 unda Pablo ta indiká reglanan spesífiko kon dos don milagroso i bíbliko mester a wòrdu praktiká den iglesia. Promé, papiamentu na lenganan den 14:27-28. Ki ora ku iglesia a praktiká e don di lenga bíbliko den Tèstament Nobo, tabatin reglanan spesífiko ku nan mester a sigui. Pa di promé, dos òf mas tantu tres por papia na lenganan den un sirbishi. Mira 14:27, “Si tin hende ta papia den lenga, laga esei sosodé pa dos òf di mas tantu tres.” Pa di dos, nan mester a papia un pa un na nan turno. 14:27 ta sigui bisa, “kada un na su turno”. Mester tabatin òrdu, mester tabatin struktura pasobra esei ta manera Dios. Pa di tres, mester tabatin un persona pa interpretá. Versíkulo 27 ta sigui bisa, “i laga un duna interpretashon; ma si no tin intérprete, lagu’è keda ketu den iglesia; i lagu’è papia ku su mes i ku Dios.” Ningun hende tabata permití pa papia na lenganan durante

adorashon korporal di iglesia si no tabatin un otro persona presente ku ta komprendé e idioma i por interpretá loke a wòrdu bisá. Pakiko? Pasobra kon nan por tabata sa si e ta papia bèrdat si òf nò? Na boka di dos òf tres testigu un asunto ta konfirmá. Pa di kwater, muhénan no tabata permit pa papia na lenganan durante adorashon korporal. E ta pone e mandamentu ei na fin...14:34, “Laga e muhénan keda ketu den e iglesianan; pasobra no ta pèrmití pa nan papia, ma laga nan someté nan mes, manera Lei ta bisa tambe.” Ta asina e donnan di Tèstament Nobo—e don di lenganan—mester a wòrdu praktiká.

Den 14:29 i 34, Pablo ta duna instrukshon kon pa praktiká e don di profesia di Tèstament Nobo. Regla number ún, dos òf máksimo tres tabata pèrmití pa profetisá durante un sirbishi di iglesia. Ripará 14:29, “Laga dos òf tres profeta papia.” Di dos, otro profetanan i e kongregashon mester evaluá e profesianan ei a base di revelashon anterior. Versíkulo 29 ta bisa, “Laga e otronan huzga.” Nan mester a papia un pa un segun 14:30, “Ma si un revelashon wòrdu duná na un otro ku ta sintá einan, laga esun promé keda ketu. Pasobra boso tur por profetisá un pa un, pa tur por siña i tur por wòrdu eksortá; i e spiritunan di e profetanan ta sometí na e profetanan; pasobra Dios no ta un Dios di konfushon, sino di pas, manera den tur e iglesianan di e santunan.” Di kwater, muhénan no tabata pèrmití pa profetisá durante adorashon korporal, segun 14:34 atrobe.

Mi ke pa boso wak e versíkulonon, i mi ke pa boso pensa tokante e guianan ei. Trágikamente mayoria práktika karismátiko awendia ta ignorá e mandamentunan bíbliko ei kompletamente. No solamente e donnan karismátiko awendia no ta donnan di Tèstament Nobo, ma e instrukshon kla ku e apòstel a duna kon pa praktiká e donnan di Tèstament Nobo di gran parti ta ignorá. Den mayoria práktika karismátiko, Spiritu Santu no ta onrá. Na lugá di esei, regularmente nan ta hasiE tristu i ta desobedesÉ. E resultado no ta e obra di Spiritu, ma ta e obra di karni, rebelion opvio maske ta donnan di Tèstament Nobo.

Eseinan ta shete argumento pro suspenshon di donnan milagroso. Kon nos mester reakshoná pa ku e argumentonan aki? Lagami dirigí mi palabranan promé na esun ku ya kaba ta konvnesé di suspenshon di donnan milagroso. No bai na un ekstremo i minimalisá e ròl di Spiritu Santu den bo bida. No pèrmití otronan pa abusá di Su nòmber pa sekuestrá e obra di Spiritu Santu. Pa di dos, tene firme na bo konfiansa den e todo-sufisiensi di Palabra di Dios. Pronto nos por ta e menoria, ma nos ta sigui e posishon historiko di iglesia i nos ta den armonia ku Skritura. Di tres, sa kiko bo ta kere i dikon. Sa kon pa defendé e bèrdat. Number kwater, rechasá tur forma di kerensia den kontinuashon di revelashon, inkluiendo e forma favorito di evangélikonan, ku Dios ta duna impreshonnan suphetivo. Nunka bisa, “Dios a bisámi.” Nunka papia tokante un sintimentu ku Dios a duna. Dios a duna nos, manera Lutero a bisa, e Palabra eksterno. Esun ku ke tende Dios papia, lagé lesa e Palabra di Dios. No duna forsa na e movimiento karismátiko dor di bo mes vershon di mistisismo i palabranan místiko komo sifuera Dios ta revelando algu na nos fuera di Su Palabra.

Finalmente, reakshoná ku prudensia pa ku diferente tipo di kerensia tokante kontinuashon di donnan milagroso. Tin diferente tipo. Si bo ta papia ku un siñadó falsu kende huntu ku nan práktikanan karismátiko ta nenga e doktrinanan sentral di e fe kristian, Hesus bíbliko, e evangelio bíbliko, no hala atras di bisa nan huntu ku Hesus ku nan ta hasi hende bira un yu di fiernu, dos bes mas pió ku nan mes. No tene miedu di usa e palabranan di Judas i 2 Pedro. Na kobardiá pa bisa huntu ku Pablo ku nan ta siña un otro evangelio i si nan no ta renunsiá e evangelio falsu, laga nan ta maldishoná.

Na e karismátiko ku a aseptá e “evangelio di prosperidat”, konfrontá nan ku e evangelio bíbliko. Reta asta esnan ku no a wòrdu indoktriná fundamentu ku e “evangelio di prosperidat”, pa eksaminá nan mes i mira si di bèrdat nan ta den e fe, òf si nan simpelmente ta buska pa kome pan di Hesus pa yena nan nesesisdat físiko, manera esnan den e promé siglo.

I pa ku nos rumannan karismátiko, esnan ku ta konfia den Hesus bíbliko i e bèrdadero evangelio bíbliko (i tin algun di nan), grasiosamente klarifiká e naturalesa di e bèrdadero donnan bíbliko manera nos a hasi awe. Kompárti arugmentonan bíbliko pro suspenshon. Kòrda nan di e

instrukshon bíbliko kon pa praktiká donnan spiritual. Trata nan manera rumannan, ma no minimalisá e diferensianan serio i importante. E sufisiensia di Skritura ta dependé di esaki.

Si bo no ta konvensé, lagámi retabo. No pèrmití bo mes pa nenga yega na un konvikshon tokante e punto aki simpelmente pa bo por tin pas ku otronan. Sea manera e hendenan di Berea ku a skudriná Skritura tur dia, pa mira si e kosnan aki tabata asina.

Skucha Martin Lutero, “Si mi ta deklará na bos haltu e eksposishon kla di tur teksto di e bèrdat di Dios ku eksepsion di presisamente e punto chikitu ku mundu i diabel ta ataká na e momentu ei, mi no ta konfesá Kristu, maske ku kuantu kurashi mi ta menta nòmber di Kristu. Unda e bataya ta tuma lugá, ta nèt ayá ku e sòldá mester proba ku e ta fiel den henter e bataya i no kobardiá òf hui riba e punto ei.” Ku Dios hasi nos fiel n’E i na su Palabra.

Copyright 2013, 2016 by Tom Pennington. All rights reserved. Used by permission.